

ՀՀ ՏԱՐԱԾՔԱՅԻՆ ԶԱՐԳԱՑՄԱՆ  
ԱՆՀԱՄԱՉԱՓՈՒԹՅԱՆ ԳՆԱՀԱՏՈՒՄԸ.  
ԱՆՀԱՄԱՉԱՓՈՒԹՅԱՆ ՉԱՓԱՆԻՇՆԵՐԸ  
ԵՎ ԴՐԱՆՑ ՀԱՄԱՐԺԵՔ ՑՈՒՑԱՆԻՇՆԵՐԸ

*Լիլիթ Սարգսյան\**

Տարածքային զարգացման անհամաչափության խնդիրն առկա է աշխարհի բազում երկրներում, որոնք առաջին հերթին բախվում են այդ անհամաչափությունների գնահատման խնդրի հետ: Յուրաքանչյուր երկիր իր տարածքային քաղաքականության շրջանակներում մշակում է անհամաչափությունները բնութագրող չափանիշներ՝ դրանց համարժեք ցուցանիշների ցանկով: Հոդվածում, որպես օրինակ, ներկայացված են լեհական կառավարության՝ տարածքային անհամաչափության գնահատման չափանիշները և ցուցանիշները: Հաշվի առնելով այն հանգամանքը, որ երևույթը վերլուծության նախնական փուլում է գտնվում, հոդվածում առաջարկվում է միջմարզային սոցիալ-տնտեսական համաչափության գնահատման չափանիշների և ցուցանիշների ցանկը, ինչպես նաև տարածքային անհամաչափությունների ամփոփ գնահատականը՝ հիմնվելով մարզերի մակարդակով հրապարակվող տեղեկատվության վրա:

Տարածքային սոցիալ-տնտեսական զարգացման անհամաչափությունը կարևորագույն հիմնախնդիր է աշխարհի տարբեր երկրների համար: Լինելով բարդ և բազմակողմանի երևույթ՝ այն մինչև օրս

---

\* ՀՊՏՀ կառավարման ամբիոնի հայցորդ:

չունի վերջնական սահմանում: Դիտարկենք մասնագիտական գրականության մեջ այդ հասկացությանը տրվող որոշ մեկնաբանումներ.

1. Տարածքային անհամաչափությունն ընդհանուր անհամաչափության դրսևորման ձև է, որն ավելի նշանակալի է դառնում, երբ տարածքային անհամաչափությունը համընկնում է քաղաքական և էթնիկական լարվածության հետ՝ խաթարելով սոցիալական և քաղաքական կայունությունը [1]:
2. Տարածքային անհամաչափությունը տարածքային նշանակության 2 ցուցանիշների՝ բնակչության խտություն և 1 շնչի հաշվով եկամտի մեծություն տարբերակվածությունն է [2]:
3. Տարածքային անհամաչափությունը կենտրոնամետ և կենտրոնախույս ուժերի հակադեցության արդյունք է [3]:
4. Տարածքային անհամաչափությունը ներկայացնում է ըստ տարածաշրջանների կենսամակարդակի, ռեսուրսների կամ ծառայությունների (օրինակ, բժշկական ծառայություններ կամ բարեկեցության մակարդակ) անհավասար մեծությունները [4]:
5. Տարածքային անհամաչափությունը պետական կառավարման ապակենտրոնացման հետևանք է [5]:
6. Տարածքային անհամաչափությունը տնտեսական, սոցիալական և բնական զարգացման մակարդակներում չհիմնավորված տարածքային տարբերություններն է [6]:

Տարածքային անհամաչափությունները կարելի է դիտարկել տարբեր տեսանկյուններից և ասպեկտներից՝ ժամկետայնության, գնահատելիության, տարածականության, վերահսկելիության և այլն: Դրանցից կարևորագույնը, թերևս, տարածքային անհամաչափության գնահատելիությունն է, այսինքն՝ այն ցուցանիշները, որոնցով կարելի է գնահատել դրա չափերը, մասշտաբները: Այդ ցուցանիշները կարող են օբյեկտիվ կամ սուբյեկտիվ բնույթ կրել: Օբյեկտիվ ցուցանիշները

քանակական են և չափելի բնույթ են կրում՝ եկամուտ, առողջապահություն, կրթություն, 1000 բնակչի հաշվով բժիշկների, մեքենաների, հեռուստացույցների, հեռախոսների քանակ: Սուբյեկտիվ ցուցանիշները վերաբերում են կոնկրետ տարածաշրջանին և ներառում են բնապահպանական միջավայրը, բնակչության սոցիալական կարգավիճակը, տվյալ տարածաշրջանի հեղինակությունը/վարկը:

Տարածքային անհամաչափությունների գնահատման չափանիշների և մեխանիզմների ընտրության առջև կանգնած երկրները հաճախ բախվում են տարածքային մակարդակով բավարար տեղեկատվական բազայի, վիճակագրության բացակայությանը (սա հատկապես բնորոշ է փոքր զարգացող տնտեսություն ունեցող երկրներին): Հայաստանն այս տեսանկյունից ևս բացառություն չէ: Այն երկրները, որոնք կուտակել են տարածքային մակարդակով բավարար տվյալների բազա, բախվում են տարածքային անհամաչափությունների գնահատման հաջորդ խումբ խնդիրների հետ, մասնավորապես՝ տնտեսական ճիշտ ցուցանիշի, տարածքային մակարդակի (տարածաշրջանի, համայնքի մակարդակով) և ընդունելի կենտրոնացվածության մակարդակի ընտրություն և այլն:

Տարածքային անհամաչափությունների գնահատումն իրականացվում է հետևյալ քայլերի հաջորդականությամբ. 1) անհամաչափության չափանիշների որոշում, 2) յուրաքանչյուր չափանիշը բնութագրող ցուցանիշների սահմանում, 3) ցուցանիշների վերաբերյալ վիճակագրական տվյալների հավաքագրում, 4) այդ ցուցանիշների հիման վրա տարածքային անհամաչափության ամփոփ գնահատականի հաշվարկ [7]:

Տարածքային անհամաչափության գնահատման առաջնային և կարևոր քայլն է համարվում չափանիշների ընտրությունը: Չափանիշներն առանձին երկրներում համընկնում են՝ տարբերվելով միայն դրանք բնութագրող ցուցանիշների ցանկով: Մասնավորապես, օրի-

նակ, լեհական մոդելում, տարածքային անհամաչափությունների չափանիշներն են. 1) տնտեսական կառուցվածքը, 2) նորամուծությունները, 3) բնական միջավայրը, 4) սոցիալական հիմնախնդիրները, 5) աշխատանքային կապիտալը, 6) հասանելիությունը: Ընդ որում, այս չափանիշներից յուրաքանչյուրը բնութագրվում է *Աղյուսակ 1*-ում ներկայացված ցուցանիշների համախմբով [7].

Աղյուսակ 1

*Տարածքային սոցիալ-տնտեսական անհամաչափության գնահատման չափանիշները (լեհական մոդել)*

| Տնտեսական կառուցվածքը                             |                                                                                                                 |                                                                                                                                                                          |
|---------------------------------------------------|-----------------------------------------------------------------------------------------------------------------|--------------------------------------------------------------------------------------------------------------------------------------------------------------------------|
| Ցուցանիշների խումբը                               | Նպատակը                                                                                                         | Ցուցանիշները                                                                                                                                                             |
| Կապիտալ ներգրավելու հնարավորություն               | Բացահայտել զարգացած և դժվարություններ ունեցող տարածաշրջանները, որոնք դժվարանում են օտարերկրյա կապիտալ ներգրավել | 1. 1 շնչի հաշվով ՕՈՒՆ-ների մեծությունը<br>2. ՏԻՄ-երի ներդրումային ծախսերի հարաբերությունը ընդհանուր ծախսերում<br>3. 1 շնչի հաշվով ռեզիդենտ տնտեսական սուբյեկտների քանակը |
| Տնտեսական զարգացման մակարդակ                      | Գնահատել տարածաշրջանների զարգացման մակարդակը                                                                    | 4. 1 շնչի հաշվով ՀՆԱ<br>5. 1 շնչի հաշվով եկամուտ                                                                                                                         |
| Աշխատուժի արդյունավետություն                      | Բացահայտել աշխատուժի շուկայի ամենաբարձր կամ ամենացածր մակարդակը                                                 | 6. Գրանցված գործազրկության մակարդակ<br>7. Տնտեսական ակտիվության մակարդակ                                                                                                 |
| Գյուղատնտեսության արդյունավետությունը և մարքեթինգ | Գյուղատնտեսության զարգացման մակարդակը տարածաշրջաններում                                                         | 8. 1 հա հաշվով գյուղատնտեսական արտադրանքի մեծությունը<br>9. 1 աշխատողի հաշվով ավելացված արժեքը գյուղատնտեսության ոլորտում                                                |

|                                                      |                                                                             |                                                                                                                                                       |
|------------------------------------------------------|-----------------------------------------------------------------------------|-------------------------------------------------------------------------------------------------------------------------------------------------------|
| Տնտեսական արտադրողականություն                        | Զբոսաշրջության կառավարման մակարդակի գնահատական                              | 10. 1 աշխատողի հաշվով ավելացված արժեք                                                                                                                 |
| Զբոսաշրջության զարգացման մակարդակ                    |                                                                             | 11. Տուրիստական հիմնարկներում (հյուրանոցներում) անկողինների քանակը                                                                                    |
| <b>Նորամուծություններ</b>                            |                                                                             |                                                                                                                                                       |
| Նորամուծությունները գիտության մեջ                    | Ակադեմիական կենտրոններում գիտության զարգացման հնարավորությունների գնահատում | 12. 1000 տնտեսապես ակտիվ բնակչության հաշվով R&D-ում ներգրավված անձանց թվաքանակը<br>13. R&D-ում ներգրավված 1 շնչի հաշվով ընդհանուր ծախսերի մեծությունը |
| Գործարարության ոլորտում նորամուծությունների մակարդակ | Տարածաշրջանների տնտեսական զարգացման մակարդակի գնահատում                     | 14. Վերջին 3 տարում նորամուծություններ գրանցած ձեռնարկատերերի քանակը                                                                                  |
| <b>Բնական միջավայր</b>                               |                                                                             |                                                                                                                                                       |
| Զրոգտագործում                                        |                                                                             | 15. Ջրահեռացում, կեղտաջրերի հեռացում                                                                                                                  |
| Թափոններ                                             |                                                                             | 16. Թափոնների քանակ, հեռացում                                                                                                                         |
| Բնական միջավայրի պաշտպանության մակարդակ              |                                                                             | 17. Օրենսդրորեն պաշտպանվող տարածքների մասնաբաժինն ընդհանուր տարածքների մեջ                                                                            |
| <b>Սոցիալական հիմնախնդիրներ</b>                      |                                                                             |                                                                                                                                                       |
| Բնակարանային տնտեսություն                            | Տարածաշրջանում բնակտնտեսության վիճակի գնահատում                             | 18. 1 շնչի հաշվով օգտագործված բնակելի տարածության մեծությունը                                                                                         |

|                                                |                                                                                         |                                                                                                                                                                         |
|------------------------------------------------|-----------------------------------------------------------------------------------------|-------------------------------------------------------------------------------------------------------------------------------------------------------------------------|
| Հանցագործության մակարդակ                       | Հանցագործության բարձր մակարդակ ունեցող տարածաշրջանների որոշում                          | 19. Ընդհանուր հանցագործությունների թվաքանակում դեռահասների հանցագործության մակարդակը<br>20. Բացահայտված դեպքերի քանակն ընդհանուր հանցագործությունների թվաքանակում       |
| Ենթակառուցվածքների հասանելիություն             | Հիմնական կրթական, մշակութային, առողջապահական հաստատությունների հասանելիության գնահատում | 21. Մինչդպրոցական հաստատություններ հաճախող երեխաների քանակը<br>22. Բնակչության հաշվով գրադարանների քանակը<br>23. Բնակչության հաշվով ամբուլատոր հաստատությունների քանակը |
| Աղքատության մակարդակ                           | Աղքատության բարձր մակարդակ ունեցող տարածաշրջանների որոշում                              | 24. Միջին ամսական աշխատավարձի մեծությունը                                                                                                                               |
| Սոցիալական կապիտալ-քաղաքացիական հասարակություն | Տարածաշրջաններում սոցիալական ենթակառուցվածքների առկայություն                            | 25. 1000 բնակչի հաշվով գրանցված ասոցիացիաների քանակը                                                                                                                    |
| <b>Աշխատանքային կապիտալ</b>                    |                                                                                         |                                                                                                                                                                         |
| Աշխատուժի որակավորում                          | Աշխատուժի ներկա մակարդակի և պոտենցիալի գնահատում                                        | 26. MBA որակավորում ունեցող աշխատողների քանակը                                                                                                                          |
| Ժողովրդագրական իրավիճակ                        | Ժողովրդագրական խնդիրներ ունեցող տարածաշրջանների բացահայտում                             | 27. Բնակչության աճի դինամիկան<br>28. Սեռատարիքային կազմը                                                                                                                |

|                                                     |                                                                          |                                                                                                                                                    |
|-----------------------------------------------------|--------------------------------------------------------------------------|----------------------------------------------------------------------------------------------------------------------------------------------------|
| Բնակչության առողջական պատկեր                        | Առողջապահական խնդիրներ ունեցող տարածաշրջանների բացահայտում               | 29. 1000 բնակչի հաշվով սրտային հիվանդությունների և քաղցկեղի պատճառով մահվան դեպքերի քանակը<br>30. Հիվանդ մարդկանց քանակը ընդհանուր բնակչության մեջ |
| <b>Հասանելիություն</b>                              |                                                                          |                                                                                                                                                    |
| Ճանապարհների հասանելիություն                        | Ավտոճանապարհների ցածր հասանելիություն ունեցող տարածաշրջանների որոշում    | 31. Ավտոտրանսպորտային ճանապարհների վիճակը                                                                                                          |
| Տեղեկատվական տեխնոլոգիաների զարգացածության մակարդակ | Թվային ենթակառուցվածքների հասանելիության խնդիրներ ունեցող տարածաշրջաններ | 32. Ինտերնետի հասանելիությունը 1000 բնակչի հաշվով                                                                                                  |

Աղյուսակից պարզ է դառնում, որ լեհական մոդելում տարածքային անհամաչափության գնահատման յուրաքանչյուր չափանիշ բնութագրվում է ցուցանիշների լայն համախմբով: Սակայն, հաշվի առնելով ՀՀ մարզերի սոցիալ-տնտեսական զարգացման մակարդակը, Ազգային վիճակագրական ծառայության (ԱՎԾ) կողմից մարզերի մակարդակով հրապարակվող տվյալների և ցուցանիշների քանակը (օրինակ, մարզերի մակարդակի ՀՆԱ ցուցանիշի, բիզնեսի ոլորտում նորամուծությունների մարզային տվյալների բացակայություն)՝ առայժմ միջմարզային զարգացման անհամաչափության գնահատման համար այս մոդելը, կարծում ենք, կիրառելի չէ:

Ելնելով ներկայումս ՀՀ սոցիալ-տնտեսական զարգացման առաջնահերթություններից և գերակայություններից՝ միջմարզային անհամաչափությունների վերլուծության համար անհրաժեշտ է կիրառել հետևյալ չափանիշները.

1. տնտեսական,
2. սոցիալական,

3. ենթակառուցվածքների հասանելիության,
4. մարզին ներհատուկ չափանիշներ:

Այս չափանիշներին համարժեք հրապարակվող ցուցանիշները ներկայացված են Աղյուսակ 2-ում:

Աղյուսակ 2

ՀՀ-ում տարածքային անհամաչափությունների  
գնահատման չափանիշները և ցուցանիշները

| Տարածքային անհամաչափության<br>գնահատման չափանիշները |                              | Չափանիշների համարժեք<br>ցուցանիշներ                                                                                                                                                     |
|-----------------------------------------------------|------------------------------|-----------------------------------------------------------------------------------------------------------------------------------------------------------------------------------------|
| <i>Տնտեսական անհամաչափություն</i>                   |                              |                                                                                                                                                                                         |
| 1.                                                  | արտադրողականություն          | <ul style="list-style-type: none"> <li>• տարածքային ՀՆԱ<sup>1</sup></li> <li>• բնակչության 1 շնչի հաշվով եկամուտի մեծություն</li> </ul>                                                 |
| 2.                                                  | ճյուղերի արտադրողականություն | <ul style="list-style-type: none"> <li>• արդյունաբերության, գյուղատնտեսության, շինարարության, ծառայությունների, առևտրի ցուցանիշներ</li> </ul>                                           |
| 3.                                                  | ներդրումների աղբյուրներ      | <ul style="list-style-type: none"> <li>• պետբյուջեից մարզերի ֆինանսավորում<sup>2</sup></li> <li>• միջազգային ֆինանսական կազմակերպություններից հատկացված միջոցներ<sup>3</sup></li> </ul> |
| 4.                                                  | աշխատուժ                     | <ul style="list-style-type: none"> <li>• տնտեսապես ակտիվ, ոչ ակտիվ բնակչություն, աշխատանքային ռեսուրսների քանակ</li> </ul>                                                              |
| <i>Սոցիալական անհամաչափություն</i>                  |                              |                                                                                                                                                                                         |
| 5.                                                  | բնակչության կենսամակարդակ    | <ul style="list-style-type: none"> <li>• միջին ամսական եկամուտ</li> <li>• միջին ամսական աշխատավարձ</li> </ul>                                                                           |
| 6.                                                  | սոցիալական ենթակառուցվածքներ | <ul style="list-style-type: none"> <li>• կրթական հաստատությունների քանակը, երեխաների քանակը,</li> <li>• բժշկական հաստատությունների քանակը, բժիշկների քանակը</li> </ul>                  |

<sup>1</sup> Մշակված է հեղինակի կողմից՝ «Տարածքային զարգացման հայեցակարգում» ներկայացված մեթոդաբանության հիման վրա:

<sup>2</sup> Հայաստանի Հանրապետության 2010-2012թթ. պետական բյուջեի կատարման վերաբերյալ հաշվետվություններ:

<sup>3</sup> ՀՀ Կենտրոնական բանկի բանբեր, 2011-2012թթ. 3-րդ կիսամյակ:

| <b>Տարածքային անհամաչափության գնահատման չափանիշները</b> |                                  | <b>Չափանիշների համարժեք ցուցանիշներ</b>                                                                                                                                                             |
|---------------------------------------------------------|----------------------------------|-----------------------------------------------------------------------------------------------------------------------------------------------------------------------------------------------------|
| 7.                                                      | սոցիալական շեղումներ             | <ul style="list-style-type: none"> <li>գրանցված հանցագործությունների քանակը</li> </ul>                                                                                                              |
| <i>Ենթակառուցվածքների հասանելիություն</i>               |                                  |                                                                                                                                                                                                     |
| 8.                                                      | ճանապարհային ենթակառուցվածքներ   | <ul style="list-style-type: none"> <li>միջպետական, հանրապետական, մարզային, համայնքային նշանակության ճանապարհների վիճակը</li> <li>պետությունից միջոցների հաշվին հիմնանորոգված ճանապարհներ</li> </ul> |
| 9.                                                      | ջրամատակարարում և ջրահեռացում    | <ul style="list-style-type: none"> <li>պետությունից միջոցներով ֆինանսավորված ջրամատակարարման և ջրահեռացման ծրագրեր</li> </ul>                                                                       |
| 10.                                                     | գազամատակարարում                 | <ul style="list-style-type: none"> <li>գազամատակարարում ունեցող տնային տնտեսությունների քանակը<sup>1</sup></li> </ul>                                                                               |
| <i>Մարզին ներհատուկ</i>                                 |                                  |                                                                                                                                                                                                     |
| 11.                                                     | Ուրբանիզացման ցուցանիշներ        | <ul style="list-style-type: none"> <li>Բնակչության խտությունը մարդ/կմ<sup>2</sup></li> <li>Քաղաքային բնակչության թվաքանակը</li> </ul>                                                               |
| 12.                                                     | սպառողական ծախսերը 1 շնչի հաշվով | <ul style="list-style-type: none"> <li>տնային տնտեսության 1 շնչի հաշվով սպառողական ծախսերի մեծությունը</li> </ul>                                                                                   |
| 13.                                                     | կենսական և բնական միջավայրը      | <ul style="list-style-type: none"> <li>մթնոլորտային տեսակարար արտանետումներ</li> </ul>                                                                                                              |
| 14.                                                     | տեխնիկական ենթակառուցվածքները    | <ul style="list-style-type: none"> <li>կեղտաջրերի հեռացում</li> </ul>                                                                                                                               |

*Աղյուսակ 2-ում* ներկայացված ցուցանիշների ցանկը սպառիչ և վերջնական չէ. միջմարզային անհամաչափությունների հետազոտման և վերլուծության խորացմանը զուգընթաց՝ չափանիշների և դրանց համարժեք ցուցանիշների ցանկը, կարծում ենք, կլրացվի, կընդլայնվի և առավել լիարժեքորեն և բազմակողմանիորեն կներկայացնի դիտարկվող երևույթը:

<sup>1</sup> Մարզային զարգացման ծրագրեր, մարզերի պաշտոնական կայքէջեր:

Տարածքային անհամաչափությունն զնահատման տեսանկյունից, կարծում ենք, առավել նպատակահարմար է կիրառել անհամաչափությունը բնութագրող ամփոփ բազմակողմանի ցուցանիշ, որը միաժամանակ կբնութագրի տնտեսական, սոցիալական ենթակառուցվածքների հասանելիության, մարզին ներհատուկ ասպեկտները: Այդ նպատակով անհրաժեշտ է առանձնացնել յուրաքանչյուր չափանիշի մեկական տիպական ցուցանիշ: Աղյուսակ 3-ում ներկայացված է տարածքային սոցիալ-տնտեսական անհամաչափության ամփոփ զնահատականը՝ իր բաղադրիչ ցուցանիշներով:

Աղյուսակ 3

ՀՀ մարզերի օրինակով տարածքային անհամաչափության  
բազմակողմանի զնահատականը

| Մարզեր           | Տարածքային անհամաչափության ամփոփ<br>զնահատականի բաղադրիչ ցուցանիշները<br>(2011թ.տվյալներով) |                                         |                                                                                           |                                     | Տարածքային անհամաչափության<br>ամփոփ զնահատական |
|------------------|---------------------------------------------------------------------------------------------|-----------------------------------------|-------------------------------------------------------------------------------------------|-------------------------------------|------------------------------------------------|
|                  | 1 շնչի հաշվով տարածքային<br>ՀՆԱ (հազ. դրամ)                                                 | Միջին ամսական անվա-<br>նական աշխատավարձ | Պետական բյուջեից<br>ճանապարհների<br>հիմնանորոգմանն ուղղված<br>վիճարկումները 1 շնչի հաշվով | Սպառողական ծախսերը 1<br>շնչի հաշվով |                                                |
| Արագածոտն        | 908.2                                                                                       | 76320                                   | 68.219                                                                                    | 27460                               | 104756                                         |
| Արարատ           | 844.9                                                                                       | 88056                                   | 12.703                                                                                    | 29330                               | 118244                                         |
| Արմավիր          | 841.3                                                                                       | 95699                                   | 12.455                                                                                    | 25173                               | 121726                                         |
| Գեղարքունիք      | 861.6                                                                                       | 88365                                   | 38.453                                                                                    | 27039                               | 116304                                         |
| Լոռի             | 690.8                                                                                       | 85004                                   | 24.105                                                                                    | 27436                               | 113155                                         |
| <b>Կոտայք</b>    | <b>902.2</b>                                                                                | <b>95682</b>                            | <b>27.212</b>                                                                             | <b>22689</b>                        | <b>119300</b>                                  |
| Շիրակ            | 783.5                                                                                       | 81824                                   | 37.191                                                                                    | 29569                               | 112214                                         |
| <b>Սյունիք</b>   | <b>1886.2</b>                                                                               | <b>131963</b>                           | <b>68.829</b>                                                                             | <b>31531</b>                        | <b>165449</b>                                  |
| <b>Վայոց ձոր</b> | <b>580.9</b>                                                                                | <b>76614</b>                            | <b>116.825</b>                                                                            | <b>33627</b>                        | <b>110939</b>                                  |
| <b>Տավուշ</b>    | <b>669.6</b>                                                                                | <b>78622</b>                            | <b>51.079</b>                                                                             | <b>32022</b>                        | <b>111365</b>                                  |

Այսպիսով, տարածքային անհամաչափության ամփոփ գնահատականը կարող է կիրառվել պետական բյուջեից, ինչպես նաև միջազգային ֆինանսական և դոնոր կազմակերպություններից մարզերին հատկացվող միջոցների մեծության գնահատման համար, մասնավորապես, այդ մոտեցման համաձայն՝ 2011թ. դրությամբ առավելագույն միջոցները պետք է ուղղվեին Տավուշի, Վայոց ձորի մարզերին, նվազագույն միջոցները՝ Սյունիքի և Կոտայքի մարզերին:

*Հոկտեմբեր, 2013թ.*

#### Աղբյուրներ և գրականություն

1. *Kanbur R., Venables A.*, Spatial Inequality and Development Overview of UNU-WIDER project, 2005, p. 2.
2. *Folmer H., Oosterhaven J.*, Spatial Inequalities and Regional Development, 1977, p. 1.
3. *Sukko K.*, Spatial inequality and Economic Development: Theories, Facts and Policies 2008, p. 12.
4. [http://en.wikipedia.org/wiki/Spatial\\_inequality](http://en.wikipedia.org/wiki/Spatial_inequality)
5. *Lessmann Ch.*, Regional Inequality and Decentralization-an empirical analysis, 2011.
6. *Kutscherauer A.*, Regional disparities: Disparities in country regional development-concept, theory, identification and assessment, 2010, p. 7.
7. Ministry of Regional Development, Regional Disparities in Poland, 2009, p. 7.

## **АНАЛИЗ НЕРАВНОМЕРНОГО ТЕРРИТОРИАЛЬНОГО РАЗВИТИЯ РА: КРИТЕРИИ И СОРАЗМЕРНЫЕ ПОКАЗАТЕЛИ НЕРАВНОМЕРНОГО РАЗВИТИЯ**

*Лилит Саргсян*

### **Резюме**

Проблема неравномерного регионального развития существует во многих странах мира, которые в первую очередь сталкиваются с необходимостью анализа этих различий/асимметрий. Каждая страна разрабатывает собственные параметры, характеризующие диспропорции регионального развития, а также список соответствующих показателей в рамках собственной региональной политики. Данная статья описывает проблему асимметрий регионального развития на примере критериев и показателей, разработанных польским правительством. Учитывая, что анализ этого явления все еще находится в начальной стадии, в статье предлагается перечень параметров и показателей анализа социально-экономического равномерного межрегионального развития на основе информации, доступной на региональном уровне.